

ANG PAGPANUMBALIK

SANG EBANGHELYO NI JESUCRISTO





ANG DIOS ANG IMO MAPINALANGGAON NGA AMAY NGA LANGITNON

Ang Dios ang Imo Amay sa Langit. Nakilala ka Niya sing personal kag nagapalangga sa imo sa bagay nga indi mo sarang matungkad. Luyag Niya nga mangin malipayon ka sa sining kabuhi kag sa wala'y katapusan.

Agud matuman ining katuyuan, ang Amay nga Langitnon nagpatigayon sang isa ka plano nga ginatawag nga **ebanghelyo*** ni Jesucristo. Si Jesucristo ang Anak sang Dios; ang Iya kabuhi kag mga pinanudlo ang giya sa paghidaet sa sining kabuhi kag kalipayan sa wala'y katapusan.

Ang aton Amay nga Langitnon nagpahamtang liwat—nagpanumbalik—sang diosnon nga mga kamatuoran nga sarang mo matun-an kag ipangabuhi. Ining mga kamatuoran ginpahayag sa mga propeta gikan sa ginsuguran.

ANG EBANGHELYO NAGABUGAY SANG MGA PAMILYA KAG MGA INDIBIDWAL

Ang ebanghelyo ni Jesucristo nagabugay sang tanan nga nagabaton kag nagapangabuhi sini. Isa sang pinakamaayo nga mga duog nga itudlo kag idapat ang ebanghelyo amo ang sa mga pamilya. Ang Dios nagpahamtang sang mga pamilya agud magdala sang kalipay sa Iya mga anak, agud magtugot sa aton nga matun-an ang husto nga mga prinsipyo sa mapinalanggaon nga kahimtangan, kag agud ihanda kita sa pagbalik sa Iya sa aton pagtaliwan. Bisan pa nga ang mga kaangtan sang pamilya mahimo nga makahalangkat kon kaisa, ang Amay nga Langitnon nagabugay sa aton samtang nagatinguhha kita sa pagsunod sang mga pinanudlo ni Jesucristo. Ining mga pinanudlo nagabulig sa aton sa pagpabakod sang aton mga pamilya.

ANG AMAY NGA LANGITNON NAGAPAHAYAG SANG IYA EBANGHELYO

Bilang kababin sang Iya plano, ang Dios nagapili sang mga propeta, pareho kay Adan, Noe, Abraham, kag Moises. Ang mga propeta:

* Ang mga tinaga nga pula ginpaathag sa mga pahina 18 kag 19.

Ang ebanghelyo ni Jesucristo sarang makapabakod sang imo pamilya.

- Nagatudlo parte sa Dios kag pinasahi nga mga saksi sang Iya Anak nga si Jesucristo.
- Nagabaton sang **diosnon nga pahayag**, ukon direksyon gikan sa Ginuo.
- Nagatudlo sang ebanghelyo sa kalibutan kag nagapaathag sang pulong sang Dios.

Ang ginpahayag
nga mga kamatuoran
nagakadula sa tion nga
ang mga tawo nagsikway
sang mga propeta.

Ang mga propeta nagabaton sang **priest-hood**, ukon sang awtoridad sa paghambal kag pagbuhat sa ngalan sang Dios agud giyahan ang Iya mga anak. Ang mga tawo nga nagaunod sa mga propeta nagabaton sang mga bugay nga ginpromisa sang Dios. Inang mga nagsikway sang ebanghelyo kag mga propeta sang Dios indi makabaton sinang mga bugay kag nagapalayo sa Dios. Inang mga nagsikway sang mga propeta kag nagapabaya sang ila pangako nga sundon ang Dios yara sa kondisyon nga ginatawag nga **apostasya**.

Bisan pa nga madamo sang Iya mga anak ang sulit-sulit nga nagsikway sa Iya kag sa Iya mga propeta, ang Amay nga Langitnon padayon nga naghigugma sang Iya mga anak. Luyag Niya kita hatagan sang tanantan nga kinahanglanon naton agud malipay sa karon kag magbalik sa Iya sa aton pagtaliwan. Ang balaan nga mga kasulatan nagapahayag sang ugali sang Dios nga sulit-sulit nga nagadab-ot sa Iya mga anak, bisan pa nga wala kita pirme nagapamati:

- Ang Dios nagapili sang isa ka propeta.
- Ang propeta nagatudlo sang ebanghelyo kag nagadumala sang mga katawhan.
- Ang Dios napakamaayo sang mga katawhan.
- Ang mga katawhan amat-amat nga nagabale-wala ukon nagalapas sang mga pinanudlo sang propeta. Sa ulihi ila ginasikway ang propeta kag ang iya mga pinanudlo kag mahulog sa apostasya.

Ang mga tinaga nga pula ginpaaathag sa mga pagina 18 kag 19.

Ang mga propeta sa Daan nga Katipan nagsulat sang mga pulong sang Dios.





- Bangod sang apostasya, ang mga katawhan wala na sang ihibalo parte sa ebanghelyo. Ang awtoridad sang priesthood ginbawi sa ila.
- Kon ang tion husto na kag ang mga katawhan handa na nga magsunod sa Iya liwat, ang Dios nagapili sang isa naman ka propeta, ginapanumbalik ang priesthood kag ang Simbahan, kag nagasugo sa propeta nga magtudlo sang ebanghelyo.

SI JESUCRISTO NAG-ESTABLISAR SANG IYA SIMBAHAN

Halin sa tion sang Pagtuga [Creation], ang mga anak sang Dios nagpaabot sang pagkari sang Manluluwas nga si Jesucristo. Pareho sang Iya ginpromisa, ginpadala sang Amay nga Langitnon ang Iya Anak nga si Jesucristo sa duta kapin sa 2,000 katuig ang nagligad.

Si Jesucristo nagkabuhi nga persekto kag wala'y-sala. Nag-establisar Sia sang Iya Simbahan, nagtudlo sang Iya ebanghelyo, kag naghimo sang madamo nga mga milagro. Nagpili Sia sang dose ka lalaki nga mangin Iya **mga Apostoles**, kalakip sila ni Pedro, Santiago, kag Juan. Gintudloan Niya sila kag ginhataagan sila sang awtoridad sang priesthood agud magtudlo sa Iya ngalan kag maghimo sing sagrado **nga mga ordinansa**, pareho sang **bunyag**.

Sang gin-establisar ni Jesus ang Iya Simbahan, nagbaton Sia sang mga panudlo gikan sa Amay nga Langitnon. Iya dayon gintudloan ang Iya mga disipulo. Gintudloan ni Jesus ang Iya mga sumulunod nga ang pahayag gikan sa Dios amo ang bato sa diin itukod Niya ang Iya Simbahan.

Si Jesucristo nag-organisar sang Iya Simbahan:

- *Iya gintawag kag gin-ordinan ang mga Apostoles.*
- *Ginhatagan Niya sila sang Iya awtoridad sa pagtudlo kag pagbunyag. Ining awtoridad ginatawag nga priesthood.*
- *Pagkatapos sang Iya pagkamatay kag Pagkabanhaw, nagpadayon Sia sa paggiya sang mga Apostoles paagi sa diosnon nga mga pahayag.*

Sa katapusan sang Iya kabuhi, si Jesucristo nag-antos kag napatay para sa mga sala sang tanan-tanan nga nagkabuhi ukon magakabuhi sa kalibutan. Ining sakripisyong ginatawag nga **Pagpasag-uli ukon Atonement**. Paagi sa Iya pag-antos, pagkamatay, kag **Pagkabanhaw**, ang Manluluwas nag-himo nga posible para sa aton nga mapatawad. Inang may mga pagtuo sa Iya, nagahinulsol, kag nagatuman sang Iya mga kasuguan nagabaton sang kapatawaran sang mga sala kag napuno sang paghidaet kag kalipay.

Pagkatapos sang Iya Pagkabanhaw, si Jesucristo naggiya sang Iya mga Apostoles paagi sa diosnon nga mga pahayag. Nakasulat sa Biblia ang madamo nga mga paagi sa diin nagpadayon Sia sa pagdumala sang Iya Simbahan (tan-awa sa Mga Binuhatan 10; Bugna 1:1). Gani ang Simbahan ni Jesucristo gindumalahan sang Dios kag indi sang tawo.

Sa pagkamatay sang mga Apostoles ni Jesucristo, ang kamatuoran nadula sa liwat.

ANG DAKONG APOSTASYA

Kasunod sang pagkamatay ni Jesucristo, madamo nga mga miyembro sang Simbahan ang gin pangdaug-daog kag gin pamatay sang malaut nga mga tawo. Ang iban nga mga miyembro sang Simbahan nagpalayo gikan sa mga prinsipyo nga gintudlo ni Jesucristo kag sang Iya mga Apostoles. Ang mga Apostoles gin pamatay, kag ang awtoridad sang priesthood—kalakip ang mga yabi sa pagdumala kag pagbaton sang diosnon nga mga pahayag para sa Simbahan—ginbawi gikan sa duta. Bangod ang Simbahan wala na ginadumalahan sang awtoridad sang priesthood, amat-amat nga nagluntad ang sayop nga mga pagtudlo sang Simbahan. Ang maayong mga tawo kag kalabanan sang kamatuoran nagpabilin, apang ang ebanghelyo nga ginpahamtang ni Jesucristo nadula. Ini nga panahon ginatawag nga Dakong Apostasya.

Ining apostasya nagresulta sa pagtukod sang madamo nga mga simbahans sa diin nagakonplikto ang mga pagpanudlo. Sa sini nga tion, madamo nga mga lalaki kag mga babayi ang nagapangita sang kamatuoran, apang indi nila makita ini. Madamo sang maayong mga tawo ang nagpati sa Dios kag kay Jesucristo kag nagtinguha sa pag-intsinde kag pagtudlo sang kamatuoran, apang wala sa ila ang bug-os nga ebanghelyo ukon awtoridad sang priesthood. Bilang resulta, ang tagsa ka

Ang Dios nakanibalo nga may matabo nga apostasya. Paagi sa isa ka propeta sa Daan nga Katipan [Old Testament], Sia nagsiling:

“Yari karon, nagaabot ang mga adlaw . . .
nga magapadala ako sing tiggulutom sa
duta, indi tiggulutom sa kalan-on, ukon
kauhaw sa tubig, kundi sang pagpamati
sang mga pulong sang Ginuo:

“Kag magadalangdalang sila [mga
tawo] kutob sa dagat pa dagat, kag kutob
sa aminhan tubtob gid sa sidlangan,
magadalagan sila pakadtopakari sa
pagpangita sang pulong sang Ginuo,
apang indi makakita sini.”

Amos 8:11–12



henerasyon nagpanubli sang isa ka kahimtangan sang apostasya bangod ang mga tawo naimpluwensyahan sang ginpasa sang nagliligad nga mga henerasyon, kalakip ang mga pagliwat sa ebanghelyo ni Cristo.

Ang pila ka inspirado nga mga persona pareho kanday Martin Luther kag John Calvin, nakahibalo nga ang mga pamatasan kag mga doktrina gin-liwat ukon nadula. Nagtinguba sila sa pagreforma sang mga simbahan nga ila ginatapoan. Apang, bangod wala sang awtoridad sang priesthood, ang ebanghelyo ni Cristo indi sarang nga ibalik sa iya sini orihinal nga estado. Ginkinahanglan ang pagpanumbalik.

ANG PAGPANUMBALIK SANG EBANGHELYO

Sang tuig 1820, pareho sang ginhimo Niya sa kabug-osan sang kasaysayan, ang Amay sa Langit sa liwat nagpili sang isa ka propeta agud magpanumbalik sang ebanghelyo kag sang priesthood sa duta. Ang ngalan sinang propeta amo si Joseph Smith. Bilang isa ka lamharon, si Joseph naligban sang mga kinalain sang madamo nga mga simbahan sa iya lugar kag luyag sia makahibalo kon diin nga simbahan ang husto. Nakahibalo sia nga kulang sia sang kaalam gani iya ginsunod ang laygay nga makit-an sa Biblia, “Kon may yara sa inyo nga nakulangan sing kaalam, papangayo sa sia sa Dios, nga nagahatag sing maalwan sa tanan nga tawo, kag wala nagabasul; kag hatagan sia sini” (Santiago 1:5).

Si Joseph Smith nagdesisyon nga magpamangkot sa Dios kon ano ang iya dapat himuong. Sang nagpangamuyo si Joseph

Si Joseph Smith nakakita sa Amay nga Langitnon kag kay Jesucristo. Sa sini nga eksperiensiya, sia nagsiling: “Nakita ko ang isa ka haligi nga kasanag nga halin gid nayon sa ibabaw sang akon ulohan, nga ang kasilaw labaw pa sa adlaw, nga nagamat-amat paidalom tubtob nga ini nagtupa sa akon. . . .

“Sang magtupa sa akon ang kasanag, nakakita ako sang duha ka mga Tinuga, nga ang kasilaw kag himaya indi masaysay, nga nagatindog sa hangin sa ibabaw ko nayon. Ang isa sa ila naghambal sa akon, nga ginatawag ako sa akon ngalan kag nagsiling, nga nagatudlo sa isa—

Ini ang Akon Hiniguma nga Anak. Pamatii Sia!”

Joseph Smith—History 1:16–17

Ang mga tinaga nga pula ginpaathag sa mga pahina 18 kag 19.

Ang Amay nga Langitnon kag si Jesucristo nagpakaíta kay Joseph Smith, pareho sa ginpakita sa pelikula Ang Pagpanumbalik.

agud makahibalo sang kamatuoran, ang Amay nga Langitnon kag si Jesucristo nagpakita sa iya. Si Jesus naghambal kay Joseph nga indi mag-entra sa bisan diin sang mga simbahan, bangod “tanan sila sayop” kag “nagatahad sila sa akon sa ila mga bibig, apang ang tagipusuon nila malayo sa akon, nga nagatudlo subong nga mga pagtulun-an sang mga sugo sang mga tawo, nga may dagway sang pagkadiosnon, apang nagapanghiwala sang gahum sini” (Joseph Smith—History 1:19).

Pareho sang ginhimo sang Dios sa ila ni Adan, Noe, Abraham, Moises, kag iban pa nga mga propeta, gintawag Niya si Joseph Smith nga mangin isa ka propeta nga paagi sa iya ang kompleto nga ebanghelyo ginpanumbalik.

Ang Pagpanumbalik sang Priesthood

*Si Jesucristo nagpadala
kay Juan Bautista kag
dayon tatlo sang Iya mga
Apostoles agud maghatag
kay Joseph Smith sang
awtoridad sang priesthood.*

Sang tuig 1829, si Joseph Smith nakabaton sang amo man nga awtoridad sang priesthood nga ginhata tag ni Jesucristo sa Iya mga Apostoles. Si Juan Bautista, nga nagbunyag kay Jesus, nagpakita kay Joseph Smith kag naghatag sa iya sang **Aaronic Priesthood**, ukon mas manubo nga priesthood. Sila ni Pedro, Santiago, kag Juan (tatlo sang orihinal nga mga Apostoles ni Jesucristo) sang ulhi nagpakita kay Joseph

Smith kag naghatag sa iya sang **Melchizedek Priesthood**, ukon mas mataas nga priesthood.

Pagkatapos nga mabaton niya ang awtoridad sang priesthood, si Joseph Smith gintulinan sa pag-organisar sang Simbahan ni Jesucristo liwat sa duta. Paagi sa iya, si Jesucristo sa liwat nagtawag sang Napulo'g Duha ka mga Apostoles.

Pareho nga si Jesucristo naggiya sang Iya mga Apostoles paagi sa diosnon nga mga pahayag pagkatapos sang Iya Pagkabanhaw, nagapadayon Sia sa pagdumala sang Simbahan sa karon nga panahon paagi sa buhi nga mga propeta kag mga apostoles. Ang Pangulo sang Ang Simbahan

Ang mga tinaga nga pula ginpaathag sa mga pahina 18 kag 19.

Sila ni Pedro, Santiago, kag Juan—mga Apostoles ni Jesucristo—naghatag sang Melchizedek Priesthood kay Joseph Smith.





ni Jesucristo sang mga Santos sa Ulihing mga Adlaw ang ginpili nga propeta sang Dios karon nga panahon. Sia, iya mga manuglaygay, kag ang Napulo'g Duha ka mga Apostoles nagakapot sang awtoridad sang priesthood nga ginkaptan sang tanan nga mga propeta kag mga apostoles sang nagligad nga mga panahon. Ining mga lalaki mga propeta, mga manugtulok (sang palaabuton) [seers], kag mga manugbugna [revelators].

ANG LIBRO NI MORMON

Bilang kabahin sang Pagpanumbalik sang ebanghelyo, ginpaluntad sang Dios Ang Libro ni Mormon: Isa pa ka Katipan [Testament] ni Jesucristo. Paagi sa gahum sang Dios, si Joseph Smith naglubad sining libro gikan sa dumaan nga mga kasulatan nga ginsulat sa mga lamina nga bulawan [gold plates]. Ang Libro ni Mormon “isa ka kasulatan sang pagpakibagay sang Dios sa dumaan nga mga pumuluyo sang kadutaan sang Amerika kag nagaunod sang kabug-usan sang ebanghelyo nga dayon” (pauna sang Ang Libro ni Mormon).

Ang Libro ni Mormon isa ka gamhanan nga saksi parte kay Jesucristo. Nagabulig ini sa aton sa paghangop sang Iya mga pinanudlo, kalakip sinang yara sa Biblia.

Ang Libro ni Mormon mabaskog nga ebidensya parte sa Pagpanumbalik sang ebanghelyo paagi kay Joseph Smith. Sarang mo mahibal-an sa imo kaugalingon nga Ang Libro ni Mormon matuod. Agud mahibal-an mo, kinahanglan mo basahon ini, binagbinagon ang iya sini nga mensahe, kag magpangamuyo agud mahibal-an kon ini matuod. Kinahanglan mo magpangabay sa Amay nga Langitnon nga

Sarang mo mahibalaoan nga ang gintudlo sang mga misyonero matuod kon ikaw magbasa kag magpangamuyo parte sa Ang Libro ni Mormon:

“Kay kon kamò magpamangkot nga may bunayag nga tagipusuon, sa matuod-tuod nga tinutuyo, nga may pagtuo kay Cristo, ipakita Niya ang kamatuoran sini sa inyo, paagi sa gahum sang Balaan nga Espiritu.

“Kag paagi sa gahum sang Balaan nga Espiritu mahimo ninyo nga mahibal-an ang kamatuoran sang tanan nga mga butang.”

Moroni 10:4–5

kompirmahon nga ini Iya pulong. Sa imo paghimo sini, Iya ipahayag sa imo paagi sa **Balaan nga Espiritu** nga ini matuod.

Kon mahibal-an mo na nga Ang Libro ni Mormon matuod, imo man mahibal-an paagi sa Balaan nga Espiritu nga si Joseph Smith nangin isa

ka propeta sang Dios, nga ang ebanghelyo ni Jesucristo ginpanumbalik paagi sa iya, kag nga Ang Simbahan ni Jesucristo sang mga Santos sa Ulihing mga Adlaw gina-dumalahan sang isa ka propeta kag mga apostoles karon nga panahon.

Paano Ako Magpangamuyo?

- *Sambita ang imo Amay nga Langitnon.*
- *Ipahayag ang mga balatyagon sang imo tagipusuon (mga pagpasalamat, mga pamangkot, mga pagpangabay sa pagkompirmar sang kamatuoran sang Ang Libro ni Mormon kag sang gintudlo sang mga misyonero).*
- *Maghingapos (“Sa ngalan ni Jesucristo, amen”).*

PAANO KO MAHIBAL-AN?

Sarang mo mahibal-an nga ining mensahe matuod. Kon magpamangkot ka sa imo Amay nga Langitnon paagi sa pangamuyo, sarang ka makabaton sang sabat gikan sa Iya paagi sa Balaan nga Espiritu. Ang Balaan nga Espiritu ginatawag man nga Espiritu sang Dios, kag isa sa Iya mga papel amo ang magsaksi, ukon magpamatuod, sang kamatuoran.

Ining ihibalo sarang mangin milagroso kag makapabag-o sang kabuhi, apang ini sa masami nagaabot bilang isa ka inanay nga pasalig, nga wala nagapasundayag sang makadalayaw nga gahum sang Dios. Ang Balaan nga Espiritu nagakompirmar sang kamatuoran paagi sa mga balatyagon, mga

hunahuna, kag mga pagpadasig. Pareho nga ginatudlo sa Biblia, “Ang bunga sang Espiritu amo ang gugma, kalipay, paghidaet, pagbatas, pagkalolo, pagkaayo, pagkatutom, pagkamapainubuson, [kag] pagpugong sang kaugalingon” (Mga Taga-Galacia 5:22–23). Ining mga balatyagon gikan sa Balaan nga Espiritu personal nga diosnon nga pahayag sa imo nga ang ebanghelyo ni Jesucristo nga ginpanumbalik paagi kay Joseph Smith matuod. Kinahanglan mo dayon nga magpili kon bala manga-buhi ka suno sa ihibalo nga imo nabaton.

Ang mga tinaga nga pula ginpaathag sa mga pahina 18 kag 19.

Sarang mo mahibaloan ang kamatuoran paagi sa sinsero nga pangamuyo.



LISTAHAN SANG MGA TINAGA

Aaronic Priesthood Ang mas manubo nga priesthood. Ining priesthood nagalakip sang awtoridad sa pagbunyag kag ginhingadlan kay Aron sa Daan nga Katipan sang Biblia.

Apostasya Kon ang mga indibidwal, ang Simbahan, ukon ang bug-os nga mga nasyon nagasikway ukon nagatalikod sa ebanghelyo ni Jesucristo. Ang apostasya nagaresulta sa pagpamatok, kagamo, kag pagkadula sang awtoridad sang priesthood, ukon sang kinamatarong sa pagbuhat sa ngalan sang Dios.

Apostoles Ang ngalan nga ginhatañ ni Jesucristo sa dose ka mga lalaki bilang Iya pinakamalapit nga mga kaupod sa tion sang Iya pag-alagad sa duta kag Iya man ginhatañ sang awtoridad nga magbuhat sa Iya ngalan. Sa moderno nga mga panahon, si Jesucristo nagtawag sang iban pa nga mga lalaki agud mag-alagad bilang Iya mga Apostoles. Pareho sang una nga mga panahon, ang isa ka Apostoles isa ka pinasahi nga saksi ni Jesucristo kag may awtoridad gikan sa Iya.

Pagpasag-uli [Atonement] Ang hitabo nga nagatugot sa aton nga makig-uli sa Dios. Ang pagpasag-uli amo ang pag-antos sang kabayaran para sa sala, nga nagakakas sang epekto sang sala gikan sa nagahinulsol nga mga makasasala. Si Jesucristo gid lamang ang isahanon nga makasarang maghimo sang perpektó nga Pagpasag-uli para sa tanan nga katawhan. Ang Iya Pagpasag-uli nagalakip sang Iya pag-antos para sa aton mga sala, sang pag-agay sang Iya dugo, kag sang Iya kamatayon kag Pagkabanhaw. Tungod sang Pagpasag-uli, ang tanan nga nagkabuhi mabanhaw. Ang Pagpasag-uli nagahatag man sa aton sang paagi nga mapatawad sang aton mga sala kag magkabuhi sa katubtuban upod ang Dios.

Bunyag Isa ka importante nga tikang sa pagbaton sang kapatawanan sang mga sala. Paagi sa bunyag kag pagkumpirma paagi sa awtoridad sang priesthood, mangin mga miyembro kita sang Ang Simbahan ni Jesucristo sang mga Santos sa Ulihing mga Adlaw. Ang bunyag paagi sa pagtugmaw, nga buot silingon ang tawo nga ginabunyagan ginatusmaw [ang bug-os nga lawas] sing makadali sa tubig. Ang bunyag nagapakita sang aton kahanda sa pagsunod sang halimbawa ni Cristo kag sa paghimo sang mga kasugtanan sa Dios.

Ebanghelyo Ang plano sang Amay nga Langitnon amo ang/agud buligan kita nga makaangkon sang paghidaet sa sining kabuhi kag kalipay sa wala'y katapusan. Ang ebanghelyo nakasentro sa Pagpasag-uli ni Jesucristo kag naga-pangayo sa aton sa pagpasanyog sang pagtuo sa Iya, paghinulsol, pagpabunyag, pagbaton sang Balaan nga Espiritu, kag pagbatas tubtob sa katapusan.

Balaan nga Espiritu Ginatawag man nga Espiritu sang Dios kag ang Manganabang [Comforter]. Sia nagaaksi, ukon nagatestigo, parte sa Amay nga Langitnon kag kay Jesucristo kag nagapahayag kag nagatudlo sang kamatuoran.

Melchizedek Priesthood Ang mas mataas nga priesthood. Ginhingadlan ini kay Melchizedek sa Daan nga Katipan sang Biblia, nga isa ka matarong kag pinakamataas nga sacerdote kag hari.

Ordinansa Isa ka sagrado, pormal nga buluhaton nga ginahikot paagi sa awtoridad sang priesthood. Isa ka halimbawa amo ang bunyag.

Priesthood Ang awtoridad kag gahum sang Dios. Ang Dios nagahatag sining gahum sa tawo (lalaki) agud magbuhat sa Iya ngalan. Ang Aaronic Priesthood ginpanumbalik kay Joseph Smith ni Juan Bautista, nga nagbunyag kay Jesus. Ang Melchizedek Priesthood ginpanumbalik nila ni Pedro, Santiago, kag Juan, tatlo sang Napulo'g Duha ka mga Apostoles ni Jesus.

Pagpanumbalik Paghimo sang isa ka butang pareho sa kon ano ini sadto; pag-estabilisar sini liwat; pagpabalik sini liwat. Pagkatapos nga ang kamatuoran kag awtoridad nadula gikan sa duta, ang ebanghelyo ginpanumbalik paagi sa Propetang si Joseph Smith. Ang Pagpanumbalik lain sa pagreforma bangod ang *pagreforma* nagakahulugan sang pagbag-o sing nagaluntad na nga organisasyon ukon pamatasan sa tuyo nga ibalik ini sa iya sini oriinal nga kahimtangan, samtang ang *pagbalik* nagakahulugan sang pag-estabilisar liwat ukon pagbag-o sang oriinal nga organisasyon ukon pamatasan sa iya sini nga kabug-osan.

Pagkabanhaw Pagkatapos sang pisikal nga kamatayon, ang pagtingob liwat sang espiritu sa ginperpekto nga pisikal nga lawas sang unod kag tul-an. Si Jesucristo amo ang una nga nabanhaw.

Diosnon nga pahayag [Revelation] Ang komunikasyon sa tunga sang Dios kag sang Iya mga anak, sa masami paagi sa Balaan nga Espiritu. Ang mga indibidwal sarang makabaton sang diosnon nga mga pahayag sa paggiya sang ila kaugalingon nga mga kabuhi, apang ang ginpili lamang nga propeta sang Dios ang sarang makabaton sang diosnon nga mga pahayag para sa bilog nga kalibutan. Ang diosnon nga mga pahayag nagaabot sa madamo nga paagi, apang sa masami ini nagaabot bilang mga panghunahuna, mga balatyagon, kag mga pagpadasig.

DUGANG NGA TULUN-AN

Ang masunod nga mga pamangkot kag balaan nga mga kasulatan makabulig sa imo nga matun-an pa gid ang parte sa mga prinsipyo sa sinining polyeto [pamphlet] kag binagbinagon ang mga ini. Ini nga listahan indi kompleto; ang mga tanda sa idalom sang mga pahina [footnotes] kag mga talamdan [cross-references] sa balaan nga mga kasulatan magatudlo sa imo sa dugang nga mga bersikulo kag mga ihibalo.

Ano ang kahulugan sa imo nga ang Dios ang imo Amay nga Langitnon?

Malaquias 2:10 (Biblia, Daan nga Katipan)

Mga Hebreo 12:9–10 (Biblia, Bag-o nga Katipan)

Ano ang papel sang isa ka propeta? Ngaa importante nga mahibaloan nga ang Dios nagahambal sa mga propeta?

Amos 3:7 (Biblia, Daan nga Katipan)

Jacob 4:4–6 (Ang Libro ni Mormon, pahina 155)

Ano ang kahulugan sang pag-angkon sang awtoridad sang priesthood? Paano ang isa ka lalaki makabaton sining awtoridad?

Mateo 10:1 (Biblia, Bag-o nga Katipan)

Juan 15:16 (Biblia, Bag-o nga Katipan)

Ano ang matabo kon inang awtoridad madula?

Amos 8:11–12 (Biblia, Daan nga Katipan)

1 Nefi 13:24–29 (Ang Libro ni Mormon, mga pahina 31–32)

Nakahibalo bala ang mga Apostoles ni Jesus nga matabo ang apostasya?

Mga Binuhatan 20:28–31 (Biblia, Bag-o nga Katipan)

2 Mga Taga-Tesalonica 2:2–3 (Biblia, Bag-o nga Katipan)

2 Timoteo 4:3–4 (Biblia, Bag-o nga Katipan)

Ano ang kahulugan sa imo nga ang ebanghelyo ni Jesucristo ginpanumbalik paagi kay Joseph Smith?

Ang Panaksihon sang Manalagnang si Joseph Smith (pamphlet)

Ano Ang Libro ni Mormon? Paano ini isa ka saksi sa tawag kay Joseph Smith bilang isa ka propeta?

Pahina sang tig-ulo sang Ang Libro ni Mormon

Pauna sang Ang Libro ni Mormon

Ano ang papel sang Balaan nga Espiritu?

Alma 5:45–47 (Ang Libro ni Mormon, pahina 287)

Moroni 10:3–5 (Ang Libro ni Mormon, pahina 724–725)

MAGSIMBA UPOD SA AMON

MAGKARI KAG TAN-AWA KON PAANO
ANG GINPANUMBALIK NGA EBANGHELYO
MAKABUGAY SANG IMO KABUHI



Ang pang-sakramento nga miting amo ang mayor nga kahiwanan sa pagsimba. Sa masami ini nagalawig sa masobra diutay sa isa ka oras kag nagalakip sang masunod:

Mga himno: Ginakanta sang kongregasyon. (Ang libro sang mga himno ginatigana.)

Mga pangamuyo: Ginasambit sang lokal nga mga miyembro sang Simbahan.

Ang sakramento: Ang tinapay kag tubig ginabendisyunan kag ginapanagtag sa kongregasyon sa pagdumdom sang Pagpasag-uli ni Jesucristo.

Mga manughambal: Sa masami isa ukon duha nga natakayan na nga daan nga mga miyembro sang kongregasyon ang nagahambal parte sa mga topiko sang ebanghelyo.

Pamiste: Ang mga lalaki kag kabataan nga lalaki sa kinaandan nagasucksok sang manami nga pantalon nga naparisan sang puti nga polo shirt kag kurbata. Ang mga babayi kag kabataan nga babayi nagasucksok sang mga bestida ukon mga palda.

Ang mga donasyon wala ginapangabay sa tion sang mga pagsimba.

Ginaagda ka man namon sa pagtambong sa dugang nga mga miting, suno sa imo mga interes kag grupo sa pangidaron. Ang pasunod kag ang oras sining mga miting mahimo nga nagkalain-lain.

Sunday School: Ang mga klase para sa pagtuon sang balaan nga mga kasulatan kag mga doktrina sang ebanghelyo.

Mga miting sang priesthood: Mga klase para sa mga lalaki kag kabataan nga lalaki nga nagapangidaron 12 kag pataas.

Relief Society: Mga klase para sa mga babayi nga nagapangidaron 18 kag pataas.

Young Women: Mga klase para sa kabataan nga babayi nga nagapangidaron 12 tubtob 18.

Primary: Pang-grupo nga klase kag mga klase para sa kabataan nga nagapangidaron 3 tubtob 11. Sa masami may nursery para sa kabataan nga nagapangidaron 18 kabulan tubtob 3 katuig.




Oras sang pang-sakramento nga miting: _____

Adres sang Simbahan: _____

Ano ang Dapat ko Himuon?

- Magbasa sang Ang Libro ni Mormon.

Ginapanugyan nga mga balasahon: _____



- Magpangamuyo agud mapat-od nga si Joseph Smith nangin isa ka propeta kag nga Ang Libro ni Mormon amo ang pulong sang Dios.

- Magsimba.

- Magpamat-od kon bala imo sundon ang Manluluwas paagi sa pagpabunyag. Petsa sang bunyag:

-
- Maglog-on sa www.mormon.org agud matun-an pa gid ang parte sa ginpanumbalik nga ebanghelyo ni Jesucristo.
 - Magpadayon sa pagpakigkita sa mga misyonero agud makatuon pa gid parte sa mga kamatuoran nga ginpanumbalik sang Dios paagi sa binago-o nga mga propeta.

Madason nga appointment: _____

Mga ngalan kag numero sa telepono sang mga misyonero:

ANG SIMBAHAN NI
JESUCRISTO
SANG MGA SANTOS
SA ULIHING MGA ADLAW

www.mormon.org

Pagpasalamat para sa mga Larawan

Atribubang nga takop: *The Lost Lamb*, ni Del Parson. © Del Parson. Indi pagkopyahan
Pahina 5: Detalye gikan sa *The Prophet Isaiah Foretells Christ's Birth*, ni Harry Anderson
Pahina 6: Detalye gikan sa *Christ Ordaining the Twelve Apostles*, ni Harry Anderson
Pahina 13: Detalye gikan sa *The Restoration of the Melchizedek Priesthood*, ni Kenneth Riley
Pahina 14: Detalye gikan sa *Jesus Christ Visits the Americas*, ni John Scott

HILIGAYNON



4 0201156861 4
01156 861